

埽垢山房詩鈔

序

嘉慶四年春爲兄子慶鎔延誦秘平黃先生於揚州先生不吝欣然就道夏五月至曲阜俾鎔習詩書禮樂之文先人世業引而日

長增亦從容論說如見叔度先生暇時輒爲

詩歌得溫柔敦厚之旨偶然感觸比興無端  
眞實之氣流露於不覺陶韋韓蘓各有可擬  
溫李之綺靡孟賈之寒瘦盧李之幽怪益未

之有吾山左自漁洋荔裳以來詩派清正若  
先生之詩何相合也先生年近七旬目光瑩  
然鬚髮黢黢白顧守韋布之素著作等身經  
世之略雖不獲試而不憂其窮抑聞先生之  
家配有德曜子有機雲春秋佳日一庭倡和  
熙熙融融何其自適也顧其爲詩也不多存  
稿增於行篋中得舊詩若干首益以山左諸  
詩次爲若干卷付諸梓人先生名文暘字時

若秋平其號甘泉人通聲律之學乾隆庚子  
兩淮漕使聘之總裁詞曲局進呈嘗以古文  
見知於彭芸楣尚書時尚書督學江蘇盛稱  
先生之學後仁和胡豫堂總憲督學時亦傾  
倒其所爲文謂之曰名手洵不虛云

嘉慶七年仲春月闕里世弟孔憲增拜撰

序

談者謂秋平爲詩人不知秋平者也秋平研窮六經融貫諸史以修其身蓄而通之得其經緯可以治繁劇決疑惑旣無知者老於橫舍閉戶著書嘗苦古來正統之說紛然莫定撰正統通志若干卷吾友凌次仲好之而爲之叙善爲論說辨難箴銘贊頌之文又好審辨金石文字有古泉考八卷長於制義格韻

在嘉隆而上善詞曲入東籬漢卿之室時而適其性情詠歌其志發而爲詩其餘事也然其醞釀者深爲有本之流取諸左右適逢其原不徒以風雲月露之詞浮慕成篇卽謂秋平爲詩人固亦可耳秋平之年長元幾三十歲自幼里巷間爲忘年交迨元入仕以來祿祿簿書雖偶相握手不終日而別益踈於言笑十餘年矣近年秋平在曲阜衍聖公尚幼

秋平爲之師觀於魯國山川孔庭禮器以博物之衷好古之志形而爲詩其所摭寫當更有進昔史克爲僖公作頌魯人歌之至今編諸三百觀秋平之詩其亦風雅之正聲也哉今春三月元外舅如川封公爲之刊板元因爲之叙如此

嘉慶七年秋八月揚州阮元撰

自古詩人之遇每以窮而益工由來才子之  
緣所難唱而得和况識超靈運悟到慧業夙  
根遂華走仙坡寫出華嚴法界若吾友者其  
在斯乎吾之得交 秋平先生也絳帳移來  
家有傳經弟子錦囊拈出人推擊鉢仙才夏  
侯乃褒成之師范雲與何遜爲友忘年許附  
隔歲猶思當其興發咏歌多在燈紅酒白力  
求格律原非字琢句敲最嗤五字未諳遽欲

辨三唐之體試看千言立就猶足當片玉之  
珍華健凌雲龍文萬斛情深舊雨鴻瓜三年  
盞惟訂元同金石之交斯得悉開府清新之  
蘊也若夫家源叔度千頃澄波居是揚州二  
分明月騎竹西之鶴恰少腰纏吞溟北之魚  
原思翮奮而乃五色空迷過眼一生不鮮送  
窮歛采隋侯之珠抱璞郢人之玉不逢伯樂  
更整轡以何心別有鍾期特授琴而見志每

自抒其懷抱亦有助于江山雪中驢背之尋  
雨夜船唇之坐殆昌黎之送東野無乃不平  
抑歐陽之論聖俞尤疑少達矣且夫移桐爨  
下不乏知音而調瑟閨中先逢同志山巨源  
結稽阮之契妻每穿墉韓蘭英追左鮑之聲  
女皆奪席讀管夫人之畫吟關進士之詩縱  
教心切刀頭詎織璇璣之錦恒覺春生筆底  
宜安翡翠之牀或刻燭以鬥竒或繫筒而郵

遠遂使梁鴻案上更添綺麗之詞秦嘉集中  
大富唱隨之句所難得者致足樂焉况復心  
清貝葉之香齒漱楊枝之露遍窺大藏斯異  
小言泉思滴滴以歸源不是因愚成佞妙手  
空空而無相原非俟醉乃逃固知入社淵明  
卽是能詩賈島也嗟嗟景達摩之面壁相期  
梅子熟時陋張俾之戴經莫說槐花黃後通  
千萬言于九十日慧証龍樹之因誦二百卷

于十三齡室有牛家之女君今山谷却非無  
佛稱尊我學孔叢未敢援儒入墨憶昔聆來  
麈尾片言逾點石之機恐今污到佛頭數語  
獲簸糠之誚

荃溪愚弟孔昭虔頓首拜撰

序

善詩者不取資於詩出其學問載以性情自道其所見自適其所適而已而得其正者莫如秋平黃先生先生於嘉慶己未夏始至吾邑就吾兄怡齋公之聘覩其神貌湛然以靜讀其所著詩輒不忍釋卷厥後花晨月夕頗有歌詠及探諸古蹟觀先代衣冠累朝法物製爲鴻章獨開生面無法不脩無境不該非

淹貫於經史百子之富而陶鑄於性靈天機  
之深者豈能爲此信乎善詩者不取資於詩  
也夫學詩而欲以詩名者衆矣其卓然特立  
可法而傳者幾人哉非詩之難其所從入者  
異也圭自與先生交乃習聞其說矣歷代各  
有選家分門別戶類以一人之見條貫古人  
之詩舍異取同齊以步武讀者追形取貌規  
規摹倣卽有小得而千篇一律圈虎檻猿竟

未知本面何似此束縛於選家之法度坐困  
於一人之樊籬而莫之知也又有上談漢魏  
六朝下規李杜韓蘓錯采鏤金專事裝飾猶  
自詡詡曰我宗何代學何人窺其用意非不  
破陳求新考其爲言無異補衲拾唾是人自  
成其爲人詩自成其爲詩并己之性情而汨  
沒之矣之二者皆近世得意爲之而先生所  
深鄙而不爲者也先生之於詩不言派不拘

體觸物感懷操筆汨汨祇以自適已意而亦  
不强所不欲以周旋世人數年中圭與先生  
交最契每清夜過訪挑燈閒話月落參橫猶  
媿媿忘倦談忠孝則可歌可泣談奸佞則宜  
雷宜霆卽偶談稗官野史神經怪錄傾刻變  
幻千態萬狀令人目眩神搖幾不自主一言  
一話詼諧嘲笑無不動人如此况乎詩以言  
志發於先生性情學問者哉先生古文制藝

並臻其極下逮詞曲無不淹雅詩其一端也  
然已復乎不可及已

嘉慶八年三月望日闕里世愚弟孔憲圭拜  
序

嘉慶五年春 秋平黃先生選輯其所作制  
藝文錄爲一集冠以小序授其二子越一年  
又刪定其所作詩歌屬其子藏諸笥中且曰  
俟我沒世後於家祭時同制藝文一陳几上  
以見我生平心血所存如是而已余聞其語  
心竊傷之嘗見近世攻詩家鬪尖新尚濃豔  
趨風者靡然從之溫柔敦厚之遺凌替殆盡  
先生力挽狂瀾偶一吟咏必規於中正和

平以自達其性情之所至不惟其詩實可傳  
且有關於世道人心者甚鉅因力請付梓并  
爲之校讐魚豕攸助剞劂以襄其成爰述其  
巔末如此至其詩之有以信今傳後者讀者  
可想見其爲人故不復贅

嘉慶七年十月旣望關里世愚弟孔憲堃跋

歸垢山房詩鈔第一卷目錄

同人集樂善菴送春有懷瑩攄大師

自題文集四絕句

秋日題壁

柳絮和韻

有序

贈淨因索和

夜雨卽事同淨因分韻

水南村墅梅花盛開時雪甚絕糧戲作長

歌

客有於歲暮餽金者作詩却之三首

雪中柬張丹崖二首

東戴雨峯二首

寶劍

冬夜看淨因畫蘭

落葉

折得蘭花一枝歸貽淨因二首

柳絲

徹葛行

秋寒戲作無衣歌示淨因

古意

七夕遇雨同淨因分題得牽牛憶織女

妻兄張石洲遠游十載歸不數月復之粵

東軍門作八律寄之

秦淮雜感三首

孟秋重過舊地有感二首

何處

秋日病中

紀夢

尤貢夫作春草行吟並兼題五律二一首見

贈依韻酬之

秋柳

郊游卽事二一首

老馬分韻得空字二一首

凍蟻

七夕同人祀奎分韻咏甌中秋花三首

冬日雜感四首

冬夜憶大兄八弟

平山堂看雪效歐公禁體用蕪公韻

煮茶聲

上巳後二日同人雨中登紅橋用漁洋山

人治春原韻絕句二十首

柳線同淨因分韻

埽垢山房詩鈔第一卷

甘泉黃文暘

同人集樂善菴送春有懷瑩攄大師

舊事一回首高吟遶上方  
念多賈島佛醒剩  
次公狂春意留尊酒離心滿  
夕陽憑闌空悵  
望雲樹揔蒼茫

自題文稿四絕句

石有封題樹有名  
萋迷小草繡春城  
孤松曾

照秦時月不向籬邊傍馬纓

七尺珊瑚百尺魚如來行處不來如綴裘結  
線兒曹事靜掩柴門自著書

片片錦鱗蛇掛樹翩翩健翮鶴摩天青霄空  
潤星雲爛下視文尸亦可憐

記得朱扉扣不開守門仙犬護蓬萊掉頭獨  
闢三山路五色靈芝手自栽

秋日題壁

深閉柴門養碧苔空堦只許月徘徊繁華悔  
未删除盡猶有秋花次第開

柳絮和韻

予少學制藝文於王一齋先生同視席  
有張丹崖者忽以柳絮一詩遍索同人  
和章予亦漫然和之越日丹崖請於師  
曰柳絮詩實幼妹所作弟子素竒秋平  
而和詩又獨佳願以妹歸之求先生主

斯盟也師索倡和詩觀之欣然曰此誠  
佳話老夫當力成之時予父客淮右師  
乃走書索幣聘焉于歸之日師作雙美  
行吳並山先生作柳絮篇合書一冊贈  
予吳詩中所謂二十八字媒者卽謂此  
詩也婦原名英字淑華予爲易其名曰  
因字之曰淨因

梅實青黃春意微吹來柳絮拂人衣鴛鴦宿

處多芳草化作浮萍不肯飛

原倡

柳絮飄空風力微吹來點點欲沾衣也知  
時世輕才調白雪陽春遍地飛

贈淨因索和

舉帷輒自喜沾沾謝女丰裁看未厭詩聖針  
神雙妙具美人名士一身兼也知料理堪花  
月未免平章到米鹽結綺交疏渾不問安排

坤山詩集卷一  
昏閣與蘆簾

夜雨卽事同淨因分韻

夜雨香閣下五更清言灑灑意俱傾頓忘宴  
爾新顏面雅稱狂夫古性情金玉土塵真達  
者詩書眠食太慙生相看不盡挑鐙思怪底  
風人說弟兄

水南村墅梅花盛開時雪甚絕糧戲作

長歌

凍雲作雪雪壓檐孤村三日無炊烟南枝北  
枝花齊放荒林野水相新鮮斫松煮雪對花  
坐古香古色得其天一片蕭聊萬古意眼觀  
鼻觀通真禪竒絕三更白月出雪光花影爭  
嬋娟此時寒香發衆妙清心夜氣同淵淵山  
妻看花亦得意吟花句好花增妍執手長吟  
同遶樹摘花嚼雪腹果然有如深山坐太古  
爛煮白石酌清泉三旬九食覺多事絕無烟

北土...  
火真神仙安得花開常不落免我乞米走市  
塵

客有於歲暮餽金者作詩却之

繁霜冷雪足清歡竹箭松筠摠耐寒羞買絲  
絲繡趙勝好留粉本盡袁安最憐水外梅偏  
早不記人間歲已殘賤性硜硜成痼疾柴門  
反欲爲君關

最愛冰堅與玉清蕭然終日絕逢迎激昂已



北湖早茫茫烟水多已無魚可食只有  
客能歌雪積黯朝靄澌流咽晚波詩人愁最  
慣此際更如何

不憤數輕薄自憐獨立身鷗機看爾狎龍性  
爲君馴落落鍾期志悠悠管仲貧好來相慰  
悅冰雪共嶙峋

東戴雨峯

幾日不相見茫然似遠游情全輸我輩詩半

寫離憂路滑思携手雲癡欲壓頭衝泥如可  
出小聚亦風流

望望冬將盡幽單鎮寂寥卧堅三尺雪吟瘦  
十圍腰天意猶難卜梅竟未可招深盃期痛  
飲醜壘待君消

寶劍

寶劍神爭秋水寒恥將長鉞客中彈半生未  
了恩仇事留取時從醉裏看

冬夜看淨因畫蘭

淒風吹雪逼窓紗  
坐擁薰籠曠意賒  
幽興愛卿還  
勃勃呵開凍筆寫蘭花

落葉

落葉受輕風  
茫然昧所之  
宛轉復踟躕  
似憶繁華時  
繁華不可再  
憔悴念故枝  
婆娑生意盡  
真心惜別離  
感此纏綿意  
未肯下堦墀  
願爲根下土  
明年發榮滋  
今年葉落處  
明年新

葉垂今年葉落時明年新葉飛盛衰豈有定  
秋氣悲復悲所以至情人義理以爲師淡或  
如水止安能似雲癡達哉漆園叟於物人能  
齊

折得蘭花一枝歸遺淨因

羞將俗艷供新妝折得幽蘭贈孟光好與荆  
釵稱韻友香從清處更生香

愛把名花靜寫真

淨因愛  
畫蘭

試將花意比精神

看卿清韻如花韻合是前身與後身

柳絲

東風一樹柳絲柔挽住春情送客愁到得春  
殘愁不盡又隨飛絮入紅樓

做葛行

西風勅做葛輕飄然披葛出門去西風吹葛  
鏗作聲搖肩負風葛有力遮頭涼雨葛有情  
歸來山妻憐瘦骨筍有做絮顛倒傾從容引

臂別表裏衣絮尚葛增膨脝嗚乎葛做君莫  
怒護持做絮免敗露

秋寒戲作無衣歌示淨因

促織鳴嬾婦驚回頭語山妻爾毋聽此心忤  
忤頽倒敝笥百不有殘書成束筆如帚免將  
砧杵鬧清秋金針不戀丹青手颯颯秋風細  
雨多輕羅細葛奈秋何更解秋衫換美酒得  
酒與子還高歌君不見牛衣泣消磨意氣空

鳴喞又不見敗絮慚丈夫一笑開歡顏李生  
宮錦金閨彥杜老短衣同谷縣男兒哀樂一  
何常光焰萬丈隨時見踈梧饑鳳思高騫雄  
鳴雌和何軒軒犢鼻飄零愁夜雨蛾眉笑語  
得春溫春風淡蕩秋風澁長歌舒嘽短歌急  
但覺高歌有鬼神當歌最愛臨風立歌闌風  
急漫欵欵我出奇計卿躊蹰滿志灑柔  
翰好將雲漢寫成圖北風其涼雲漢熱葛衣

還能當朔雪

古意

宋玉東鄰住紅牆隔絳樹不惜三年窺自關  
相思路相思無天涯何況住妾家芙蓉開並  
頭郎貌如蓮花蓮花在芳渚容易隨風舞蓮  
子是妾心願郎知妾苦晨起理新妝雲鬟七  
尺長同心綰雙結交鎖兩鴛鴦開篋拂羅綺  
楚楚浮春香藕花染頰色光艷挺空房搵頭

看郎面低頭理針線不願暫相歡但願常相  
見相見尙相思何堪有別離郎身有時去妾  
心無時移西風知妾意郎看柳腰肢

七夕遇雨同淨因分題得牽牛憶織女

本來銀漢是紅墻

用李義山句

盼到佳期已斷腸

厭雨恰逢秋寂寂臨風空憶路茫茫金波頻  
溢添雙淚雲錦遙憐罷七襄一夜相思一載  
恨帝鄉惆悵歲華長

妻兄張石洲遠游十載歸不數月復之

粵東軍門作八律寄之

仗劍孤身萬里游，還家已是十春秋。  
人民誤認歸來鶴，天地能容泛水鷗。  
歡笑久踈翻似客，別離已慣不知愁。  
高堂見否蕭蕭髮，望遠年來盡白頭。

小樓方丈淨無塵，記得登樓問字頻。  
已羨茅容能養母，可憐王粲又依人。  
籬邊松菊原無

恙眼底雲山太認真  
硯匣書床應好在天涯  
何處乞閒身

悵絕秦淮病裏秋  
蕭然獨卧雨中樓  
江山况值銷冤別  
書劍都成刺骨愁  
舊約空留人已去  
封函未啟淚先流  
可憐七尺難安放  
不是

男兒好浪游

石洲約予會於金陵及予抵秦  
淮已留書逕去矣予亦大病幾

死不能入

棘闌而歸

萬古長江浪拍天  
中流呼酒獨潛然  
我歸君

去俱無賴日落雲浮盡可憐陣陣飛鴻達路  
遠枝枝柔櫓浪花圓擔書投筆知誰是此日  
含悽覺汝賢

百粵山川圖畫開短衣匹馬又重來南通嶺  
海峯巒峻東注湘灘水勢迴鄉國回頭空悵  
望雲烟過眼劇悲哀有苗舊已歸文德間煞  
陳琳作檄才

好花片片欲扶春游子何方望白雲嬾把文

章干博士盡開武庫奉將軍倚門目斷空千  
里過嶺梅香已十分若到羅威舊閭里繁憂  
知爾最紛紜

清巧詩歌鮑令暉每懷同氣重依依夢中春  
草離人路客裏秋風游子衣慘澹情隨斜日  
遠飄零怕見落花飛一函別恨殷勤寄知爾  
開緘有淚揮

時淨因寄書

相逢青眼足清狂底事悠悠道路長折柳送

君無處所登堂爲爾幾徬徨  
殘陽冉冉留雅影暮雨霏霏斷雁行  
何日歸來相慰悅不辭  
倒屣更傾筐

秦淮雜感

西風漠漠大江平  
引入長河便有情  
金粉六朝流不盡  
都來嗚咽作秋聲

一樣長橋卧水波  
一般秋水碧羅羅  
無端古渡名桃葉  
賺得闌干共撫摩

綠楊影趁水悠悠只載笙歌不載愁日日蘭  
橈盪歌去有人愁絕柳邊樓

秋夜重過舊地有感

於今覓得愁來處只是難追已斷冤細細鳴  
蟲如有恨沉沉斜月漸無痕啼鳥遶樹空三  
匝遷客憑欄憶舊恩淒絕不堪良久立一天  
雲影送黃昏

相逢不語欲如何  
燈燼香消風驟過  
花亦牽

衣都惜別人來又手獨高歌滿庭舊恨留芳  
草一片新愁對女蘿秉燭依依尋往蹟可憐  
零落已無多

何處

何處此良夜蕭然一徑開月光添聞寂樹影  
趁低徊宿鳥靜復靜懷人來不來茶烟應未  
歇更漏又相催

秋日病中作

病魔難遣日悠悠  
添得閒中幾許愁  
只當閉關安寂寞  
本來無客足淹留  
昏窓舊雨牽魂  
斷布被新寒  
結夢游分附金風  
莫銷骨好依籬菊  
過深秋

紀夢

寂寂虛堂聽暮鐘  
夢中識路渺能通  
女蘿滿地隨秋草  
閒煞庭前一樹松

尤貢夫作春草行吟齋兼題五律二首

見贈依韻酬之

下士多狂態青雲未解攀春風拂頰面畫意  
得幽閒野色連天暗柴門鎮日關劇憐南浦  
上吟望隔江山

不是憐芳草黃茅白葦多千秋有松柏賤子  
亦藤蘿行與烟雲會吟招風雨過年年春滿  
眼爲爾着愁魔

秋柳

鎮日臨波弱不支西風吹水碧參差年來顧  
影憐腰瘦怕說靈和殿裏時

郊游卽事

仲夏草木長濃陰萬綠齊同志二三友盪舟  
沿芳堤是時方苦旱赫赫畏炎曦油然雲忽  
密涼意頗淒淒春衣正瀟洒何須披葛絺世  
人方趨熱誰能探幽竒繫舟長橋下高吟過  
招提披襟秋意入頗愛簫管稀空山寂無人

時聞幽鳥啼蕭蕭數點雨  
清心發天倪薰風  
自南來氣候倏以移  
登舟遶城角路僻草離  
離寂寂桃花菴幽深不可窺  
路轉逕愈僻古  
岸失高低田田新荷葉幽香滿  
清溪畫舫不  
肯入荇藻結成蹊草色連樹影  
粘天碧黍差  
桃源泛孤艇轉愁歸路迷  
舟子促登岸低徊  
意遲遲喧啾厭城市  
傍徨何所之

舟行意已愜舍舟乃陸行相携且信步何須

間前程言尋竹林寺古道何縱橫振衣厭蒼  
耳失路入榛荆登高辨岐途野趣相逢迎行  
行人村落竹樹無俗情荳莢垂踈籬紅蓼間  
綠蘓茅茨傍野水幽意與之呈童叟雜歌笑  
頗愛守真誠夾路蠹松栢古墓失王名佳日  
且作達胡爲勞其生小倦何所適荒祠走麕  
麕興盡覓歸路所見失所經斯時天漸暝光  
景晚彌清尋常烟與樹迷離與目爭疑山復

疑水暮色呈晶瑩村酒共一醉頽然覆其觥  
歸來淪苦茗五嶽悠然平援筆紀游蹟殘鐙  
暗復明

老馬分韻得空字

陣雲片片接高空昂首還矜倜儻雄錦勒花  
殘餘朔雪大旗日落怯秋風披圖尙剩千金  
骨展足曾開萬里功太息生平經戰伐只將  
麟閣繪羣公

欵段都誇學步工，鹽車應老出群雄。  
五花烏啄新瘡紫，六印龍飛舊血紅。  
未肯受恩身久棄，自憐識路眼全空。  
清高深穩誰能賞，淚滿郊原苜蓿叢。

凍蝶

莫嘆春駒凍可憐，寒雲冷雨亦因緣。  
銷除輕薄花歸夢，懺悔繁華雪是禪。  
枯柳昔曾同艷冶，傲梅原不愛周旋。  
秋風恨未知機早，羨煞

高吟脫壳蟬

七夕同人祀奎分韻擬中秋花

斗牛光氣正軒軒次第名花笑欲言惟有紫  
薇顏色異奎星原近紫微垣

桂早蘭幽一色開軍持折取供金盃渾疑花  
樣今宵好莫是天孫織得來

冬日雜感

寒風逐冰雪牽纏不忍分身世看硯跡冷落

何足云歲月忽已暮往事徒紛紛蹉跎到圓  
月狼藉多浮雲

山妻耽筆墨丹青頗爲累畫債日追呼襪材  
常委積作畫復題詩蹙損眉間翠嬌兒方學  
語踞案搜筆筍學母作苦吟支頤若深思無  
端發天籟句成五七字竒想落天外徃徃多  
異致有時遶苔堦搖首復掉臂曼聲歌長句  
聊以事游戲對之頗欣然琴書或可寄

庭前老梅樹今年花頗稀  
輕紅十餘蕊愛惜等珠璣  
種樹不作花何以酬春暉  
花少乃見多平心理亦非

鐙黑形覓影相需竟何事  
遠寺發鐘聲聽之不能寐  
曉起饑腸鳴數錢市餅餌  
出門路茫茫側身事天地  
紛紛雪似綿想見溫厚意

冬夜憶大兄八弟

兄弟各何處飄零賤與貧  
獨憐五夜影還憶

四方人道路驚風雨平安祝鬼神丁寧勉予  
季努力事晨昏

平山堂看雪效歐公禁體用蘓公韻

浙瀝長空集寒葉淡淡碧天落輕雪我來獨  
立蜀岡巔拍手狂呼叫竒絕濕雲低遶萬家  
烟樵路依稀辨曲折仄練橫空風曳動平舖  
樹頭鳥跡滅飄入水面尋不見細細蹴起波  
紋纈惟有萬山深處深欲因人熱搃不屑傾

酒高歌客最狂茫茫世宙側目瞥須臾更覺  
衣袖重眼底模糊向誰說振衣拂袖歸去來  
歸來布被冷於鐵

煮茶聲

跌坐蒲團萬慮輕茶鐺影裏煮孤檠抽漆活  
火催多事聚散浮漚破不平止識水心原有  
韻幻歸泡影寂無情風生兩腋諸緣淨天籟  
悠然更善鳴

上巳後二日同人雨中登紅橋用漁洋

山人治春原韻

一生知着幾兩屐不負春光特地來行到紅  
橋齊拍手眼前生面爲誰開

花鳥無端會惱人最難排遣是青春鶯歌柳  
舞濛濛雨莫厭傷多酒入唇

用杜句

湖光十里畫圖中烟簇樓臺霧罨紅此是澹  
妝西子面同來放眼莫匆匆

垂楊一帶趁風飛  
雨洗沙明車馬稀  
暢好狂歌容我輩  
任他沾灑暮春衣

年少春塲踏落紅  
短衣匹馬綠沉弓  
十年不記悲歡事  
贏得春前鬢似蓬

日日春愁未有涯  
春光來去揔堪嗟  
狂奴最愛風和雨  
怕見東牆日影斜

三十過頭百不成  
春山春水可憐生  
江山如此人如此  
賸得飛揚酒性情

記得蕭蕭看秋柳柔條綽約未全知東風纔  
與栽培力便向人間管別離

幾家酒市倚春城取次橋頭又賣餠都付迷  
離今日雨自來春夢不分明

白白紅紅莫問名門墻高處樹叢生從他石  
逕苔痕滑怕作扶花傍柳行

春風弄粉復調脂桃杏辛夷別樣姿一樹海  
棠嬌欲醉成團蝴蝶上花枝

頓覺愁眉十尺開  
一天空翠滴蒼苔  
誰家歌吹真無賴  
惱亂青山又一回

醉翁門下說坡仙  
千載漁洋起後賢  
今日風流邈何處  
春風楊柳自年年

清才張藉迥超倫  
古貌稜稜別有神  
春水一湖楊柳岸  
教人常憶葛天民

張丹崖在北湖

春草初齊絕可憐  
高吟最愛遠游篇  
江鄉雨過春何綺  
且典春衫當酒錢

郊原冷落逢寒食，龍忌從來說禁烟。何事人生不作達，白楊空博古今憐。

狂來脫帽絕輕塵，何必林宗墊角巾。寄語花宮休草草，東南才子共扶春。

隨意高吟坐野苔，詩成那用管絃催。竹西不讓山陰好，只少烏衣子弟來。

王馥堂有約不至

荒烟衰草酒盃前，往事依稀二十年。今日春光成錦繡，水臺花榭早春天。

上巳清明纔兩日漁洋修禊憶芳型十風五  
雨催行樂記取紅橋橋上亭

柳線同淨因分韻

壓線年來太寂寥登樓怕見柳條條彌縫花  
事功偏苦拖逗春痕恨未消愁絮最多誰解  
脫情絲亂拂幾飄搖傷心嬾借東風力待與  
鳴蟬結火要

婦垢山房詩鈔第二卷目錄

贈淨因

內姪筠書女史作迎秋曲與淨因依韻和之

少時作艷體詩百首刪棄久矣陳漁秋搜得其稿而愛之爲題十絕句於後頗多  
淒婉之音感賦一律

雨花臺晚眺

登清涼山翠微亭

賦得春風吹又生

秦淮卽事

偶成

陳漁秋招致同人賦詩糊名易書評定甲  
乙予三膺首選而蘋花詞一闕尤爲諸  
君激賞主人有佳茗名箋之贈作一律

紀盛

題張丹崖詩集

送汪繡谷入都門

客真州夜坐戴雨峯水閣話舊卽次其移

居四律原韻

陳漁秋客死淞西招魂哭之

送汪琢砮返宣城

相見行爲友人戲作

秋郊有感同韋酉山作三首

過仙人掌弔柳屯田墓

焦公洞

朱思堂都轉命往桐城敦請姚姬傳夫子

再主梅花書院講席呂江花見送口占

一絕

口占留別淨因

舟過天門山

六百丈遇風

江行憶淨因

黃陂湖口夜宿

呈姚姬傳夫子

夜登龍眠絕頂

山店夜宿

曉行大峽

夜宿合肥村店解后梁思義愛其樸雅留  
之小飲奉贈一律

春日郊行卽事

淨因四十初度贈四律索和

淨因和前韻見示疊韻酬之四律

埽垢山房詩鈔第二卷

甘泉黃文暘

贈淨因

閉戶先生年復年  
閨房慚愧擁飛仙  
錦心入賦情彌細  
畫手臨機色更鮮  
別有酸鹹同臭味  
常將甘旨累香奩  
閒中愛讀梁鴻傳  
成就難忘德耀賢

內姪女筠書作迎秋曲與淨因依韻和

之

悲懷常覺四時秋  
合得秋心一字愁  
惟有西風知此意  
好携長笛上高樓

倦眼拋書午  
睡長北窻風透藕  
花香炎涼都入  
羲皇夢笑煞高梧  
一葉忙

畏日常多愛  
月情銀河盼得漸  
分明浮雲莫漫嫌  
輕薄讓出清光  
分外清

荷絲漸老薄  
風懷蓮性清  
清佛作胎  
未必金

許黃山谷星聚原推陳太邱五字長城堅壁  
壘一時高會重揚州影園銷歇斯文在又說  
蘋花有狀頭鄭超宗影園開黃牡丹廣徵一  
謂之牡丹狀元時名士之詩以黎遂球爲第一  
此吾鄉舊事也

題張丹崖詩集

君不見上古女媧搏黃土散作智愚紛相忤  
又不見造物幻出馬與龜鑿開混沌面目非  
元珠一粒落何許舉世勞勞尋不歸東山聖

人述往哲千古智者說破舌祖龍一怒焚群  
書草野愚夫奮臂呼呼者何意說何故問之  
智愚都不悟惟天不智亦不愚任人播弄自  
徐徐惟我不愚亦不智不飲也能終日醉白  
楊風起冢蕭蕭萬古賢愚共寂寥閒拋書卷  
登樓望沈寥依舊青天高勸君努力飲美酒  
醉鄉原在無何有

送汪繡谷入都

抵死留春春不住留得相思夢中路夢中識  
路會相思到底蒼茫誤雲樹君不見花枝辭  
樹樹空綠一路風吹香馥馥天涯不少金瓶  
水金瓶恩重金鈴哭又不見垂柳條條拂兩  
岸綰住春情絲不斷偏是春光易別離愁心  
無主飛花亂柳花柳花奈爾何紅樓一帶嫩  
人多只恐蛾眉爭見妬鄭重臨風一曲歌咳  
唾因風落珠玉尋常猶自嫌拘束玳瑁筵前

竹笛多只會陽春莫度曲陽春常爲守花宮  
男兒原是可憐蟲歌吹每從蜂蝶散人間何  
事不匆匆匆匆偏上木蘭舟紅櫻綠筍枉風  
流便是封侯原有骨忍教花間杜宇愁掃開  
榆錢拂柳絮竟從杜宇聲中去軟紅塵裏望  
揚州綠楊城郭知何處

客真州夜坐戴雨峯水閣話舊卽用其

移居四律原韻

隱誤巢由官誤儒  
名山讓爾闢榛蕪  
花知得意秋同瘦  
鷗解忘機水亦愚  
文室埽除天下志  
一家孝友近今無  
閉門覓句真餘事  
豈爲烟霞愛逸居

等閒換羽又移宮  
往事升沉類轉蓬  
今古山光清嘯在  
盈虛天意晚潮通  
琴書有伴還餘我  
鬚鬢無情漸欲翁  
值得當前歌與哭  
一林木葉舞西風

風塵十載兩蹉跎  
杯酒相逢足嘯歌  
子夜歌殘星欲動  
天涯酒散雨偏多  
共憐春夢同波逝  
且守秋燈莫浪過  
聞雁三更添寂寞  
聽鷄幾度舞婆婆

揚子居原應寂寥  
人知人否摠囂囂  
清才澹蕩千峯月  
壯志飛揚八月潮  
文字憑君齊董賈  
江山容我混漁樵  
闌干拍遍明河轉  
煮酒重將石火猷

陳漁秋客死淞西招魂哭之

魂歸來去時路浙江不可住開君東西廂拂  
君綠陰床老母攀戶妻在房生離何短死何  
長斑然狸首隔容光持君衣呼君魄冷雨酸  
風滅紅燭悽悽夢中言醒來亂心曲亂心曲  
其奈何人間咫尺愁風波何況泉臺道路多

送汪琢砮返宣城

有絲繡秋雲不繡平原君有鐵鑄千莫不鑄

九州錯阿誰天下有心人故人千里憶汪倫  
汪倫有心兼有膽飲酒擊劍生平敢汪倫好  
義兼好愁吟詩千首輕王侯八年之別今復  
見相見猶留舊時面相見之時亦可憐囊空  
我無沽酒錢相見時難別亦難見時還作別  
時看主人供客太草草剩有狂言共傾倒君  
寓河東我城北一水盈盈間歌哭君因病困  
步履淹我亦朝朝困米鹽依舊相思不相見

憂魂空自添依戀意亂心悲最可憐紅日看  
看一線添頭九與二九相逢不出手饑寒如  
合璧無獨必有偶此時長鏡空歸來妻子對  
之色死灰高堂白髮刺人目男兒那得不局  
促此時登登誰扣門汪生使來致寒溫一卷  
新詩報離別彫人顏色消人魂作詩送君氣  
抑塞筆凍手彊寫不得嗚乎風雪滿天地君  
竟決然刺舡去留君不住送君行送君行萬

感生且復斯須執手立千秋萬古此時情

殫去後卽以病死千秋萬古竟成詩讖  
痛哉痛哉

相見行爲友人戲作

蜨鬧春房蜂坐衙多情楊柳絆飛花碧月無  
端歸海嶠西風有夢走天涯天涯一去頻留  
戀屈指朝朝在山縣別恨飄搖趁柳花啼痕  
淹漬留紈扇扇底桃花人面嬌堤邊楊柳別  
魂銷月明遼海三千里春冷揚州念四橋春

來春去情嗚咽雙飛空羨花間蝶並口難尋  
促膝盃雙眉猶印同心結縮得同心怕別離  
重來心事兩心知猶認春林花面目最憐秋  
病柳腰肢玉人慣識天台路翻似仙郎當日  
誤九曲情腸委轉通一條門巷依稀遇曲巷  
何來剝啄聲抬頭瞥見猛魂驚梅花夜月還  
疑夢圖畫春風錯認卿香透羅衫春楚楚仔  
細端相舊眉嫵陡起羞痕暈海棠耐他絮語

欺鸚鵡一點情根却不磨前宵牛女渡銀河  
藕絲不斷蓮心苦煤燼重燃燭淚多殘夢今  
生許再續池頭戲看鴛鴦浴束臂還留條脫  
金當胸亂掛玲瓏玉玉指纖纖上玉肌別來  
何事最相思朦朧窺爾三分醉宛轉酬郎一  
種癡一種癡情經百煉仙源又得重相見從  
此深深護白雲莫教又泛桃花片

秋郊有感同韋酉山作

不負槐花路上來看山携得片雲回偶憐叢  
菊違高枕又被垂楊勸舉盃簫鼓畫舫秋水  
澗簾攏雕榭暮雲開布衣兄弟貧兼病只合  
秋風共溯洄

何處飛鴻響遠音臨風搔首動哀吟文章有  
價惟烟月歌哭無端自古今遇酒只須開口  
笑看山纔見故人心愛霜舊有楓林約莫遣  
寒雲結暮陰

催人暝色漸昏黃  
聯袂行吟興未央  
莫怪去來都寂寂  
可憐身世本茫茫  
半生知己惟雙鬢  
千古傷心剩夕陽  
歸去莫愁前路黑  
照人還有月蒼涼

過仙人掌吊柳屯田墓

歌哭無端雜醉醒  
金仙掌上露冷冷  
曉風殘月花間淚  
紅袖青衫地下靈  
天子憐才容放曠  
才人到此感飄零  
竹西路近多歌吹  
檀板

銷魂不忍聽

焦公洞

烟霞留性石留情若有人兮舊結盟不屑五  
形同夢幻何須三詔說尊榮西江水接羊裘  
冷東海潮連席帽清鹿鹿此身成一笑胷中  
壘塊已全平

朱思堂都轉命往桐城敦請姚夢穀夫  
子再主梅花書院講席呂江花見送

口占一絕

長江千里布帆開，醉爾深情酒百盃。  
曾見蘓門六君子，臨岐今有幾人來。

口占留別淨因

征衣熨貼舊時痕，屈指三秋兩出門。  
奉母課兒全累汝，莫因離別又消魂。

舟過天門山

帝遣名山鎮上游，芙蓉兩朶古今浮。  
陽臺路

近雲生態杜宇江連水漸愁行雨忽來催入  
暮楚風大抵好悲秋布帆正壓新霜重一夜  
蘆花盡白頭

六百丈遇風

危坐孤篷萬慮芟浪花如雨上征衫豚飛水  
面迎風拜蛟立波心對客饒涉險也知終到  
岸人生何似早收帆耦耕舊有生平約安穩  
深山是藥鏡

江行憶淨因

常愛閨中畫，今從畫裏游。  
入山原有約，借隱幾時酬。  
水遠難爲夢，雲歸欲寄愁。  
何年携硯匣，同泛五湖舟。

黃陂湖口夜宿戲作

時湖涸泥淤舟車  
兩無所施

始信途窮絕，可憐旱無車。  
馬水無舡，三更風雨家。  
千里萬頃烟波草，一椽負販聯床通寤寐。  
雞豚遶膝費周旋，人生到此翻成悟。  
抵讀

南華內外篇

呈夢穀夫子

命駕遽云遠登堂宿願酬  
心香焚一瓣吾道足千秋  
盛德休歌鳳離懷自夢鷗  
淵源看逝者日夜水東流

夜登龍眠絕頂

絕磴懸天碧綵鋪人生到此  
卽蓬壺懷中月滿千峯靜  
足底雲搖萬樹扶短袖欲  
承星影

土山行房言金二卷二  
陽三張本  
墮長吟直接雁聲孤拂衣便好乘風去安用  
藏真抱一符

山店夜宿

鐙識寒山意孤暉靜有餘半生殊草草一枕  
此徐徐何必黃梁熟真教百慮除僕夫催曉  
發笑客又征車

曉行入峽

山合林深路杳冥松濤隱約走雷霆置身無

地雙崖黑仰面看天一線青老樹扶人根作  
磴深溪走瀑石如舩長吟我欲呼山鬼朗誦  
離騷一卷經

夜宿合肥村店解后梁思義愛其樸雅  
留之小飲作一律贈之

爲看青山結古歡一肩行李路漫漫月高屋  
角纜維馬雨合天涯愛伯鸞怕序愁懷供齒  
冷且拚痛飲莫眉攢相逢只是難爲別雲樹

圓頭不忍看

春日郊行卽事

紅橋二月春闌珊  
雨脚乍歇泥未乾  
東風習習散嫩寒  
羊裘脫去春衣單  
長堤探梅結古歡  
鐵榦遠亞如龍蟠  
霜剝雪蝕恣剗剗  
此花只合匹幽蘭  
橫塘曲曲水漫漫  
怪石鳴蹲障激湍  
新柳覆綠鈎者磻  
簫鼓中流驕達官  
王郎丰格誇宋潘  
我輩青眼界何寬  
湖光山色

羅大觀法海氤氳擁旃檀夕陽雙寺鐘聲殘  
茶帘深處小勾欄當爐二妙烹龍團金刀劈  
蔗水晶盤笑指李下休整冠蔓草四野露溥  
溥何來惡少氣桓桓何來狐媚步珊珊居然  
聯坐細語謹恨無三尺摘其奸掉頭不顧游  
興闌雲際一抹浮遠巒眉黛如掃許人看安  
得乘風江外駕飛鸞烟霞爲我作晨餐徘徊  
古岸發長嘆路轉峯廻沿河干風雨驟合竹

萬竿玉笋林立大石磐鬼斧鑿削昆刀刊三字  
插天青琅玕紅樹堂前列賽壇錢神燈聚  
而蜂攢俚歌引調柔以曼振金伐鼓聲不完  
財虜肉食體獨胖解衣高踞貌爲端自矜顧  
悞肆譏彈可憐昏昏困執執苑花遶蜨燦星  
丸杏蕊舒紅烟籠榦陌上王孫趁歸鞍晚風  
拂水迴紫瀾畫舫齊泊綠楊灘村鷄喔喔遠  
音翰荒郊延跣足力殫古墓狡兔穿破何人

棺我一見之遣心酸歸來太息淚泱泱酒酣  
一夢破邯鄲

淨因四十初度贈四律索和

影逐形依二十年看看黑髮變華巔頻加馬  
齒知天厚慣卧牛衣漸自然酬唱何曾關活  
計賤貧只是解相憐前身應作雙飛翼白石  
長松結好緣

閉門相對且從容笑把黃梁手自舂共爾名

山添事業且投大冶任銷鎔稱觴韻府調琴瑟樹幟詞壇列鼓鐘開遍群花春色麗繁華全勝五花封

眼底滄桑變態多柴門還是舊烟蘿橫經有子通詩禮收債無人間嘯歌弄石成顛添手繭畫山分韻減眉螺清閒便是神仙福笑煞金屏貼粉蛾

與爾閨房作友朋買山有約究何曾歲華只

願清如鶴功課由來冷似僧婢熟茶經知聽  
火鼠憎棋劫屢窺燈百年得此非容易不羨  
吹簫便上昇

淨因和前韻見示疊韻答之

莫謂增年是減年細添詩律到毫巔平章花  
月原推爾部署壘鹽亦洒然患難不嫌夫壻  
傲溫柔常得老姑憐半生椎髻黔婁婦辛苦  
偏多筆墨緣

破屋三間膝可容  
閒眠常到日高春  
耽吟喜得同心侶  
鑄錯難教鐵骨鎔  
猷戶有人常索畫  
聯吟無夜不聞鐘  
歲寒松柏彫原後  
任爾深山白雪封

支持家計累人多  
轉見長松附女蘿  
介壽向卿謀斗酒  
顛狂笑我只高歌  
書生歸計惟黃犢  
天女前身是白螺  
賸有吟懷消不得  
推敲終日蹙雙蛾

雜佩常將慰得朋稱身梳掠嘆何曾照人只  
似當窓月靜女常如得戒僧愛聽鳥聲多種  
樹爲評花影慣移鐙高情勝致詩兼畫不讓  
當時管道昇